

scorso in Cypro senza alboro, et *etiam* alcune galie grosse hanno persi li lor albori. Dice pochissime velle sono insieme, ma tutte sono sparpagnate. Altro de qui non ho; *solum* prego la magnificentia vostra me tegni nel numero de i sui cordialissimi, et dove io me atrovo, se son bon per far cossa torni in servilio di la magnificentia vostra, de continuo mi ricomando, etc.

*Date in galia a la vela sopra Bichieri, a di 18 Septembrio 1517.*

32 *Copia di una lettera scritta per sier Faustin Dolfin fo di missier Hironimo a sier Sebastian Moro provedador di l'armada. Data in Candia, a di 2 Octubrio 1517.*

L'altro zorno scrissi a la magnificentia vostra quanto mi achadete. Al presente fazo questa a la magnificentia vostra, come sono obligato di tutte le nove che haverò avisar la magnificentia vostra. Havendo hauto questa matina lettera di Rodi scritta a di 24 dil passato, la qual mi scrive missier Muzio Costanzo cavalier di Rodi, però mi ha parso de mandar la copia di dita lettera a la magnificentia vostra, e questa è la copia.

Di le nove coreno de qui, a ben che son certo vostra signoria sia avisata, tutta volta per far parte del mio debito, li mando, poi che non hò potuto più presto, almeno con li presenti pasazi, risponder, per lettere di Cypro; le qual nove portano uno patron de una nave schiavona parti da Alexandria a di 12 Avosto insieme con l'armada turchesca capetanio el Munucho, con la qual velizò zercha mia 160 et tendeva verso Castel Ruzo, dove el dito patron con bono modo se separò de la ditta armada per andar in Cypro. À portà tal nove. Zonse a le Saline a di 16 Avosto narando *ut infra*. Primo, dita armada disse esser numero 110 vele da esso numerate, *videlicet* galie grosse numero 1, galie bastarde, che fono dil Soldan, numero 21, galie sotil numero 45, el resto bastardele. Sono palandarie grandè numero 7 et picole numero 8, nave numero 7, zoè una candiota di botte 600, una zenoexe di botte 1000 carga di formenti, la nave Chaleza da Syo et una barza carga di ehariagi, et una raguxea e doi turchesche, ei resto sono fuste. La qual armada doveva andar a la volta de Syo, poi a Constantinopoli, e da poi dischargata, in Satalia. Le fameglie tolte dal Cayro e de Alexandria, con loro la sua facultà, da numero 1300, insieme con el Zaus Allì di Alexandria con tutta la

sua fameglia e parentado; la qual armada paserà per et canal de Rodi, con ordine del Signor turcho di non danizar alcuno loco di la Illustrissima Signoria nostra. *Etiam* dize haver lassato in porto di Alexandria tra navilli di Venexia e di Candia, et altri da 32<sup>\*</sup> zercha 25, li quali di zorno in zorno aspetavano licentia, et tute le spezie dil Soldan morto e dei margarini che era fugiti, è stà carge sopra dita armada per Constantinopoli. Ancor dize, come in porto di Alexandria è restata la nostra galia grossa carga di spezie, batuda per portar, el forzo zenzeri, et una nave patron de la dita Nicoletto da Liesena, sopra la qual era spezie, copari et zenere et altre merchadantie. *Item*, per el capetanio de la dita galia, con el Conseio di 12, havea tolto una nave per libar dita galia per ogni bon respeto; el patron de la dita nave era nominato Antonio Parapunchi da Venexia, à stagno per ducati 510. Et dita nave esser a conto di varii à sopra la merchadantia. Apresso, haveano terminado, per dito Conseio di 12, che la nave del Corresi, che fo licentiata per el capetanio de l'armada, che dovesse restar per conserva di la dita galia. Dizeno ancor, trovandose a di 10 Luio al Cayro, vete far la monstra di cavali e zente dil Turcho, tra li quali cavali e pedoni in tutto erano 30 milia, per andar a la volta di Alepo. Poi fo ditto, per certe novitade occorse, se dize de arabi come de altri, che 'l Signor turcho se invernèrà per questo anno al Cayro; e più se dize, che molti armiragii erano andati da Sophi con molti mamaluchi, et che de tutto il numero de li schiavi non poteva esser morti da zercha 7000. Ancor dicono che la Mecha era restata a obedientia del Signor turcho, et quelli de la Mecha haveano presentato gambeli numero 100, con presente per la valuta de ducati 20 milia. De Sophi nulla se dize. Curtogoli sono restà dismesso di l'armada et havea di provisione aspri 80 al zorno. Et nel Cayro poteva esser da fuste numero 25. In Alexandria non era rimaso alcuno navilio turchesco de merchadantia; nulla si parlava. Subito zonta questa tal maledeta armada a la Finicha, mandò uno ambador schiavo del Signor turcho con letere proprie dil Signor turco, suplicando pazè con molte parole, con presenti apresentati per el capetanio di l'armada. Per non haver tempo non vi scrivo; ma per el primo scriverò el tutto a la signoria vostra.

Questo sono quello ho per via di Rodi. Aviso la magnificentia vostra, come sono zonte a Setia le do galie sotil, la Garzona et Trivisana, carge di formenti, et di zorno in zorno si aspetta di qui. Altro non ho per hora, salvo a quella mi ricomando.